



Mintzaidetza

AIETEKO FORO SOZIALA

EPPKren Mintzaidetzak gatazka politikoaren konponbidearen inguruan bizi dugun egoera gogoan hartuta, Aieteko konferentzian marraztutako ibilbidean den Foro Soziala eta egindako Gomendioak aipatu nahi ditu euskal jendartearen aurrean:

TESTUINGURUA

Espainia eta Frantziako gobernuek gatazka politikoaren konponbide prozesua blokeatu dute. Espainiako agintariek, hartutako konpromisoak ez dituzte bete eta Frantzia, harekiko erabat lerrokaturik agertzen da. Bi biek oraingoz, ez dute Aieteren bide orrian sartu nahi. Jarrera honek prozesuak sortu dezakeen aukera demokratiko berriari estatuek dioten beldurra erakusten du.

Konponbidearen ibilbidea trabatu asmo dute presooi baldintza gaindiezinak ezarri, kaleratzeak oztopatu eta prozesua usteltzeko. Denbora haien alde baliatu nahi dute, presoen eremuan urratsik ez emateak EPPK-an haustura ekarriko duelakoan, arazoa Ezker Abertzaleak duela sinistaraziz.

Euskal Jendartearen gehiengo zabala aldiz konponbidearen alde da. Ahalegin handia egiten ari dela aitortzen dugu. Ipar Euskal Herrian eremu politiko osoaren bultzada azpimarratzekoa da.

Batzuk ordea, zabaltzen ari den bideari bizkar eman nahi diote. Besteri inplikazio handiagoa exijitu beharko genieke. Gatazka politikorik ez eta preso politikorik ez dela arinkeriaz antzeztu dute Gasteizen. Jokabideok oztopo dira gatazkaren ondorioen konponbidean interesa duen ororentzat. Bistan da, prozesuak herriaren babes eta bultzada ezinbestekoa duela, nazioarteko eragileena bezala. Guztion konpromisoa, EPPK-k berea berresten du, Euskal herria eta bere etorkizunarekiko beti izan duen ardura politikoa beregain hartuz.

FORO SOZIALA

Baionan joan den abenduan Bake Bideak antolatutako jardunaldien ondotik badela segidarik garrantzitsua deritzogu. Baionan bezala, martxoaren 14-15an Iruñean eta Bilbon izan den parte hartze zabala baikorki azpimarratu nahi dugu:

- Nazioartetik modu desinteresatuan partaide izan diren pertsonalitate eta elkarteak.
- Euskal Herriko alderdi politiko, eta eragile politiko, sozial eta ekonomikoen parte hartzea.
- Jendarte zabaleko herritarren parte hartze zuzena, unibertsitate eta beste eremuetatik bezala herritar xumeena ere bai.

-Kanpotiko esperientziak eskaintzen parte hartu duten hizlarien konpromiso eta seriotasuna.

EPPKren Mintzaideok Foroan parte hartze zuzena ahalbidetzeko eskaera ofiziala egin arren Gobernuak uko egin diote aukera honi. Bitartekarien bidez Mintzaideen presentzia bermatu den arren, aurrera begirakoan beste ekimenetan parte hartzeko asmoa berresten dugu.

GOMENDIOAK

Gomendioek eremu zabala jorratzen dute. Gaiak partzialki jorratu baino, gomendioen multzo osoa aintzat hartzea ezinbestekoa da. Gatazka politikoaren konponbide osoa aintzat hartzea bezala.

Gomendioak, eta bere garapen dinamika, herriaren adostasun zabala eraikitzeari begira eta estatuen itxikeria aldarazteari begira, mugarri berria izan daitezke. EPPK-k ikuspegi propio, baikor eta eraikitzailetik inplikatzeko jarraituko du.

Gure Kolektiboa jabetzen da beregain duen erantzukizunaz prozesua hauspotzeko. Gomendioak jaso eta aztertzeko konpromisoa hartzen du. Bere baitan gogoeta zabala ireki eta kidego osoaren iritzia eta ekarpenekin posizioa finkatzeko. Herriarekin batera bidea egiteko konpromisoa berretsi eta gogoetaren ondorioak ezagutzera emango ditu.

EPPK-k Euskal Herrian abiatutako prozesuan parte hartzeko erabakitasuna berretsi nahi du, eztabaidak baldintza egokietan burutzeko eta erabakiak hartzeko oztopo handiak ezartzen zaizkion arren. Sakabanaketak amaitu egin behar du eta honek guztion bultzada definitiboa behar du. Lortuko dugu!

Euskal presoak Euskal Herrira! Amnistia-autodeterminazioa!

EPPKren Mintzaidetza

Euskal Herria bihotzean, 2013ko maiatzean